


CBETA電子佛典集成

CBETA Chinese Electronic Tripitaka Collection
ebook

X38n0698

梵網經直解事義



中華電子佛典協會

目次

- [編輯說明](#)
- [章節目次](#)
 - [上卷之一](#)
 - [上卷之二](#)
 - [下卷之一](#)
 - [下卷之二](#)
 - [No._698_A 楚網經直解跋並頌](#)
- [卷目次](#)
 - [1.](#)
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

上卷之一

翻譯

翻譯者。謂翻梵天之語。成華夏之言。譯者。易也。周禮設四官以達四方之事。東曰寄。南曰象。西曰狄鞮。北曰譯。今翻西語而云譯者。以經傳漢世。譯官多事北方。兼善西語。故易梵言曰譯。

五住

五住者。謂即五住地煩惱也。三界見惑為一住。即見一切住地。三界思惑分為三住。即欲愛住地。色愛住地。有愛住地也。根本無明為一住。即無明住地。由此五惑。能令眾生住著生死。故名住地也。

△見一切住地者。乃三界分別見惑。由意識對法塵分別。起諸邪見。住著三界故。

△欲愛住地者。乃欲界思惑。由意根對內我境起貪愛心。而於欲界住著生死故。

△色愛住地者。乃色界思惑。以諸眾生不了此惑。住著色界禪定。不能出離故。

△有愛住地者。乃無色界思惑。以不了此惑。住于禪定。不能出離故。

△無明住地者。乃根本無明惑。謂諸聲聞。緣覺。未了此惑。沈滯真空。住於方便土中。大乘菩薩方能除斷。由餘惑未盡。住實報土。故名無明住地也。

二死

二死者。一分段生死。分。即分限。段。即形段。謂六道眾生。隨其業力。所感果報身命。身。則有長有短。命。則有壽有夭。而皆流轉生死也。

△二變易生死。謂諸聲聞。緣覺。菩薩。雖離三界內分段生死。而有方便等土變易生死。如初住為因。後住為果。又後住為因。後後住為果。以其因移果易。故名變易生死也。

海有十德

海有十德者。海以深廣為名。謂佛智海。深廣無涯。以喻十地菩薩。入佛智海十德之相。故以十德表之。

△一次第淵深德。

△二不受死屍德。

△三餘水入中皆失本名德。

△四普同一味德。

△五無量珍寶悉蘊其中德。

△六無能至底德。

△七廣大無量德。

△八大身所居德。

△九潮不過限德。

△十普受大雨無有盈溢德。

六十二見

六十二見者。謂於五蘊法上起執我見。如執色大我小。我在色中。色小我大。色在我中。離色是我。即色是我。如執色蘊有四我見。受想行識。各有如是四我見。五四成二十見。過去二十。現在二十。未來二十。共六十。加斷常二根本。合六十二見。

三十六物

三十六物者。一髮。二毛。三爪。四齒。五眵。六淚。七涎。八唾。九屎。十尿。十一垢。十二汗。**已**上為外相。十三皮。十四膚。十五血。十六肉。十七筋。十八脈。十九骨。二十髓。二十一肪。二十二膏。二十三腦。二十四膜。**已**上為內相。二十五肝。二十六膽。二十七腸。二十八胃。二十九脾。三十腎。三十一心。三十二肺。三十三生臟。三十四熟臟。三十五赤痰。三十六白痰。此上為內舍。

五種不淨之身

五種不淨之身者。一生處不淨。是身為臭穢。不從蓮花生。二種子不淨。是身種不淨。父母邪想有。三自性不淨。四大不淨聚。海水洗不潔。四自相不淨。常流出不淨。如囊盛穢物。五究竟不淨。諦觀於此身。終必歸死處。

四滿成佛

四滿成佛者。一者。信滿成佛。謂依種性地。決定信於諸法。不生不滅。清淨平等。無可願求是。為信滿成佛。即文中求求至心。無生空一願之義。

△二者解滿成佛。謂依解行地。深解法性。無造無作。不起生死想。不起涅槃想。心無所怖。亦無所欣。是為解滿成佛。即文中觀觀入定照。無量見縛等義。

△三者。行滿成佛。謂依究竟菩薩地。能除一切無明諸障。菩提行願。皆悉具足。是為行滿成佛。即文中行滿願故。

△四者。證滿成佛。謂依淨心地。得無分別寂靜法智。及不思議勝妙功德。是為證滿成佛。即文中佛果便成。觀一諦中道之義。於四滿中。單舉解慧是願體性者。此種性位。是信成就發心。起行修行。故云解慧為願體性。為一切行本源也。

五利使

五利使者。即身。邊。邪見。見取。戒禁取也。利。即快利之義。謂此五種妄惑。動念即生。造次恒有故。使。即驅使之義。謂諸眾生。於此五種妄惑。驅役心神。流轉三界。無有出期。二義合言。故名五利使也。

△一身見。謂諸眾生。於名。色。五陰。十二入。十八界中。妄計為身故。

△二邊見。謂即於前身見。或執為斷。或執為常。各執一邊故。

△三邪見。謂諸眾生。邪心取理。撥無因果。斷滅一切善根故。

△四見取。謂諸眾生。於非真勝法中。謬計涅槃。生心取著。於邪見中。執為正見故。

△五戒禁取。謂諸外道。於非戒中。謬計為戒。如雞狗等邪戒。以為真戒。取以進行故。

五鈍使

五鈍使者。即貪瞋癡慢疑也。鈍。即遲鈍。使。即役使。謂此五種妄惑。由推前身見等五種利使而生。對利說鈍。故名鈍使也。

△一貪使者。謂貪著世間色欲財寶。恣縱心情。引取而無厭足故。

△二瞋使者。謂眾生於違情境上。起諸瞋恚忿怒。惱亂自他故。

△三痴使者。謂諸眾生。迷心緣境。於一切法。不能明了故。

△四慢使者。謂諸眾生。自恃種姓富貴。有德有才。輕蔑於他故。

△五疑使者。謂諸眾生。迷心乖理。於諸法猶豫不決。不能通達故。由此五惑之所驅役。流轉三界。故名使也。

百三昧

百三昧者。大智度論具明白八三昧。茲言百者。略舉大數也。

△首楞嚴三昧。於諸三昧行相。悉能分別了知。究竟一切魔惱。不能破壞故。

△寶印三昧。於一切三昧。悉能印證。然諸寶中。法寶為最故。

△師子戲三昧。於諸三昧。出入自在。如師子戲。能制羣獸故。

△妙月三昧。能除無明黑暗。諸法邪見故。

△月幢相三昧。如大將以寶幢。作月之像。見者悉皆順從故。

△出諸法三昧。能令一切三昧。出生增長故。

△觀頂三昧。入是三昧。徧見諸三昧故。

△畢法性三昧。決定知諸法性。而得定相故。

△畢幢相三昧。決定持諸三昧法幢。最為尊勝故。

△金剛三昧。智慧堅固。能破諸三昧故。

△入法印三昧。持此法印。能入諸法實相故。

△三昧王安立三昧。於諸三昧中。安住自在故。

△放光三昧。能放種種光明。照諸三昧故。

△力進三昧。於諸三昧。得自在力。變現度生故。

△高出三昧。諸三昧性。從心而出。福德智慧。悉增長故。

△必入辯才三昧。能辯說一切三昧。知眾生語言經論等。分別無礙故。

△釋名字三昧。能解諸法三昧名義故。

△觀方三昧。以平等心。觀十方眾生。皆得度脫故。

△陀羅尼即三昧。持諸三昧印。分別諸三昧。皆有陀羅尼故。

△無誑三昧。不生愛。恚。無明。邪見。於諸三昧。都無迷悶之事故。

△攝諸法海三昧。能攝三乘諸法故。

△徧覆虛空三昧。或放光明。或以音聲。充徧無量虛空故。

△金剛輪三昧。持三昧輪。入一切法。所至無礙故。

△實斷三昧。持此法寶。能斷一切三時煩惱諸垢故。

△能照三昧。以智慧明。照了諸法故。

△不求三昧。照諸法如幻。於三界愛欲。悉斷無求故。

△無住三昧。照諸法念念無常。無有住相故。

△無心三昧。心心數法。皆悉不行故。

△淨燈三昧。離垢慧燈。清淨明發故。

△無邊明三昧。以智慧明。普照無邊世界故。

△能作明三昧。如燈入暗。無不明了故。

△普照明三昧。如寶珠光。四邊普照故。

△堅淨諸三昧。清淨堅牢。垢法無染故。

△無垢明三昧。離無明愛欲煩惱諸垢。明照一切三昧。故。

△歡喜三昧。能生無量法歡喜樂故。

△電光三昧。於無始來所失之道。還復能得。如電光顚現。行者得路故。

△無盡三昧。滅諸法無常等相。入不生滅真實之理故。

△威德三昧。有無量威德自在莊嚴故。

△離盡三昧。見諸三昧。無有窮盡離一切斷滅之見故。

△不動三昧。知諸法實相。寂然不動故。

△不退三昧。住是三昧。不退轉故。

△日燈三昧。能照種種法門。如日燈破暗故。

△月淨三昧。慧照圓明。如月除暝故。

△淨明三昧。明照諸法。無有障礙故。

△能作明三昧。能與般若智相應。於諸三昧門。而作光明故。

△作行三昧。能發起先所得諸三昧故。

△知相三昧。見一切三昧中。有實智慧之相故。

△如金剛三昧。能破煩惱結使。無有遺餘故。

- △心住三昧。能攝散心不動轉故。
- △普明三昧。神通光明。普照諸法故。
- △安立三昧。於一切功德善法中安立。堅固不動故。
- △寶聚三昧。能轉一切國土。皆成七寶故。
- △妙法印三昧。得諸佛菩薩。深妙功德智慧之法。印諸三昧故。
- △法等三昧。能照眾生諸法。悉皆平等故。
- △斷喜三昧。厭離苦。空。無我。不淨之相。不起樂著之想故。
- △到法頂三昧。以般若方便之力。而到於法山之頂故。
- △能散三昧。能於空慧相應。而能破散諸法故。
- △分別諸法句三昧。能分別諸法語言文句。為眾生說。詞無礙故。
- △字等相三昧。觀諸字諸語。悉皆平等故。
- △離字三昧。謂不見字在義中亦不見字在字中故。
- △斷緣三昧。於苦樂三受。遠離不著。心滅緣斷故。
- △不壞三昧。了法畢竟空寂。戲論不能破。無常不能轉故。
- △無種相三昧。了法無相。而不見諸法種種之相故。
- △無處行三昧。於三界火宅。菩提涅槃。畢竟空寂。不依止故。
- △離朦昧三昧。於微翳無明等。悉皆除盡故。
- △無去三昧。不見一切諸法去來之相故。
- △不變異三昧。觀一切法。不見有變異之相故。
- △度緣三昧。於六塵中諸煩惱緣。悉皆度脫故。
- △集諸功德三昧。修集一切善根功德。初中後夜。無休息故。
- △住無心三昧。住諸法實相中。**但**隨智慧。不隨於心故。
- △淨妙華三昧。於諸三昧中。開諸功德華。自在莊嚴故。
- △覺意三昧。令諸三昧變成無漏。與七覺相應故。
- △無量辯三昧。以無量辯才。樂說無礙故。
- △無等等三昧。觀一切法。皆同佛法。與無等等般若波羅蜜相應故。
- △度諸法三昧。能入三解脫門。超出三界。度三乘眾生故。
- △分別諸法三昧。能分別善。不善。有漏無漏。有為。無為等相故。
- △散疑三昧。除一切疑網。得一切諸法實相故。
- △無住處三昧。不見諸法定有住處故。
- △一莊嚴三昧。能觀諸法。皆以一相智慧莊嚴故。
- △生行三昧。觀種種行。入。住。出相。皆空不可見故。
- △一行三昧。與畢竟空相應。更無餘行故。
- △不一行三昧。以此三昧。兼行餘行故。
- △妙行三昧。不見諸三昧二相。即是畢竟空相應三昧故。

△達一切有底三昧。以無漏智。通達三有。乃至非有想。非無想之底。悉皆令其散壞故。

△入名語三昧。於一切諸法名字語言。無不解了故。

△離音聲字語三昧。觀一切法。皆無音聲語言。常寂滅相故。

△然炬三昧。以智慧炬。照一切法。無錯無著故。

△淨相三昧。謂能清淨具足莊嚴三十二相。及觀諸法總相。別相。無無相故。

△破相三昧。於諸三昧相。無住無著故。

△一切種妙足三昧。能以諸功德。種種莊嚴。禪定。智慧。悉皆具足故。

△不喜苦樂三昧。於世間苦樂諸境。皆不喜樂故。

△無盡相三昧。觀一切法。不斷不常。無壞無盡故。

△陀羅尼三昧。住是三昧。則能持諸三昧。而聞持等諸陀羅尼。皆自然而得故。

△攝諸邪正相三昧。謂於正定。邪定。不定聚。一切眾生。都無所棄。一心攝取。而不見有邪正等相故。

△滅憎愛三昧。於可喜。不可喜法中。不生愛瞋故。

△逆順三昧。於諸法中。逆順自在。能破一切邪逆眾生。能順一切可化眾生。而又不著逆順之相故。

△淨光三昧。於諸三昧。光明清淨。諸煩惱垢。皆不可得故。

△堅固三昧。以與諸法實相智慧相應。皆悉堅固故。

△滿月淨光三昧。清涼智光。能滅三毒之火故。

△大莊嚴三昧。以七寶香。莊嚴恒沙佛國處故。

△能炤一切世間三昧。三世間一切諸法。皆悉能炤故。

△三昧等三昧。觀諸三昧。無有淺深。與諸法相。皆悉平等故。

△攝一切有諍無諍三昧。於一切法。不見是法如是不如是。於眾生中。亦無好醜諍論。**但**隨心行而攝受度脫故。

△不樂一切住處三昧。謂不樂住世間。以世間無常故。不樂住非世間。不著於空故。

△如住定三昧。如。即有無不二之義。謂知一切法如實相。不見有法過此如者故。

△壞身衰三昧。以智慧力。分分破壞身諸衰相故。

△壞語如虛空三昧。不見諸三昧語業。依聲而有故。

△離著虛空不染三昧。菩薩修行般若波羅蜜。觀諸法畢竟空。不生不滅。於此虛空三昧之相。亦不染著故。

百法明門

百法明門者。具有百八。今舉百者。略而言也。本行集經云。佛寄兜率天。作護明菩薩。將欲下生時。說此留與諸天。以作憶念。後

下生也。

△百八者。所謂正信法明門。不破堅牢心故。

△淨心法明門。謂無穢濁故。

△歡喜法明門。謂安隱心故。

△愛樂法明門。令心清淨故。

△身行正行法明門。身三惡業清淨故。

△口行淨行法明門。斷口四惡故。

△意行正行法明門。斷貪等三毒故。

△念佛法明門。觀佛清淨故。

△念法法明門。觀法清淨故。

△念僧法明門。得道堅牢故。

△念施法明門。不望果報故。

△念戒法明門。一切願具足故。

△念天法明門。修廣大心故。

△慈法明門。隨處善根攝勝故。

△悲法明門。不害眾生故。

△喜法明門。捨一切不喜事故。

△捨法明門。厭離五欲故。

△無常觀法明門。觀三界慾故。

△苦觀法明門。斷一切願故。

△無我觀法明門。不染著我故。

△寂定觀法明門。不擾亂心意故。

△慚愧法明門。內心寂定故。

△羞恥法明門。能滅外惡故。

△實法明門。不誑天人故。

△真法明門。不誑自身故。

△行法明門。隨順法行故。

△三歸法明門。淨三惡道故。

△知恩法明門。不捨善根故。

△報恩法明門。不欺負他故。

△不自欺法明門。不自譽故。

△為眾生法明門。不毀訾他故。

△為法法明門。如法而行故。

△知時法明門。不輕言說故。

△攝我慢法明門。智慧滿足故。

△不生惡心法明門。自護護他故。

△無障礙法明門。心無疑惑故。

△信解法明門。決了第一義故。

△不淨觀法明門。捨慾染心故。
△不諍鬪法明門。斷瞋訟故。
△不癡法明門。斷殺生故。
△樂法義法明門。求法義故。
△愛法明門。得法明相故。
△求多聞法明門。正觀法相故。
△正方便法明門。真正行故。
△知名色法明門。除諸障礙故。
△除因見法明門。得解脫故。
△無怨親心法明門。於怨親中。生平等故。
△除方便法明門。知諸苦故。
△諸大平等法明門。斷一切和合法故。
△諸入法明門。修正道故。
△無生忍法明門。證滅諦故。
△身念處法明門。諸法寂靜故。
△受念處法明門。斷一切諸受故。
△心念處法明門。觀心如幻故。
△法念處法明門。智慧無翳故。
△四正勤法明門。斷一切惡成諸善故。
△四如意足法明門。身心輕安故。
△信根法明門。不隨他語故。
△進根法明門。善得諸智故。
△念根法明門。善作諸業故。
△定根法明門。心得清淨故。
△慧根法明門。現見諸法故。
△信力法明門。過諸魔力故。
△進力法明門。謂不退轉故。
△念力法明門。謂不共他故。
△定力法明門。斷一切念故。
△慧力法明門。謂離二邊故。
△念覺分法明門。如諸法智故。
△擇法覺分法明門。炤明諸法故。
△精進覺分法明門。謂善知覺故。
△喜覺分法明門。謂得諸定故。
△除覺分法明門。知一切法平等故。
△捨覺分法明門。厭離一切法故。
△正見法明門。得漏盡聖道故。
△正分別法明門。斷一切分別。無分別法故。

△正語法明門。斷名字音聲如響故。
△正業法明門。無業無報故。
△正命法明門。除滅一切惡道故。
△正行法明門。謂至彼岸故。
△正念法明門。不念一切法故。
△正定法明門。無散亂故。
△菩提心法明門不斷三寶故。
△依倚法明門。不樂小乘故。
△正信法明門。得最勝佛法故。
△增進法明門。成就一切善根法故。
△檀度法明門。教化眾生。遠離慳貪故。
△戒度法明門。教化破戒眾生。遠離惡道故。
△忍度法明門。教化眾生。捨瞋恚慢故。
△進度法明門。教化眾生。遠離懈怠故。
△禪度法明門。教化散亂眾生故。
△智度法明門。教化愚癡眾生。斷無明黑暗故。
△方便法明門。應機說法故。
△四攝法法明門。普攝眾生故。
△教化眾生法明門。不生疲倦故。
△攝受正法法明門。斷一切眾生諸煩惱故。
△福聚法明門。利益眾生故。
△修禪法明門。滿足十力故。
△寂定法明門。成就如來諸三昧故。
△慧見法明門。大智滿足故。
△入無礙辯法明門。法眼成就故。
△入一切行法明門。佛眼成就故。
△成就陀羅尼法明門。悉能受持佛法故。
△得無礙辯法明門。令一切眾生皆歡喜故。
△無生法忍法明門。謂得受記故。
△不退轉地法明門。具足往昔諸佛法故。
△從一地至一地智法明門。謂灌頂成就一切智。乃至得成阿耨多羅三藐三菩提故。

上卷之二

九十五種

九十五種者。西域外道。有九十五種。束為十一宗。一數論師。計神我諸諦。二勝論師。計六句義。三塗灰師。計自在天。四韋陀

師。計那羅延天。五安茶論師。計本際。六時散外道。計物從時生。七方論師。計方生人。人生天地。八路伽耶。計色心法。皆極微作。九口力論師。計虛空為萬物因。十宿作論師。計苦樂隨業。十一無因論師。計自在生。

三細

三細者。對六麤而言。即根本無明之惑也。一業相。即從真起妄。初動之相也。然本覺心源。離念寂靜。因無明故。覺成不覺。遂成業相。二能見相。即見初動之相也。亦名轉相。謂依初動業識。轉成能見之相也。三境界相。即轉相分別初動之境界也。亦名現相。繇前轉相。則境界妄現也。

六麤

六麤者。繇三細而生。故名六麤。一智相謂依第三境界相。不了自心所現。妄起分別。於染淨境。起愛不愛故。二相續相。謂依前智相分別。於愛不愛境。生樂生苦。覺心起念。相續不斷故。三執取相。謂依前相續緣念苦樂等境。心起著故。四計名字相。謂依前執取分別。假名言說之相故。五起業相謂依前名字。執取生著。造種種業故。六業繫苦相。苦。即生死之苦。謂依前起業繫縛。則有生死逼迫之苦。不得自在故。

二十五諦

二十五諦者。一冥性。二智大。三我心。四五唯量。即色聲香味觸五塵也。五五大。即地水火風空也。六五知根。即眼耳鼻舌身也。七五作業根。即手足口。大遺。小遺也。八心平等根。即意根也。九神我主諦。合有二十五法。

三淨土

三淨土者。一常寂光土。亦名法性土。此即法身如來所依理土。通為諸土體故。

△二寶報莊嚴土。此即報身如來所受用土。有二。一者。自受用土。即以所修自利。行滿。從初成佛。盡未來際。變為純淨佛土。眾寶莊嚴者是。二者。他受用土。是即所修化他行滿。乃隨十地菩薩所宜居處。或大。或小。或勝。或劣。變成淨土者是。

△三變化土。亦名凡聖同居土。即是應身如來變化之土。謂佛以不可思議神力。隨諸眾生善惡之業。變現淨穢之土。方便設化故。

五怖畏

五怖畏者。一不活畏。謂諸初學菩薩。雖行布施。不能盡已所有。即恐自己不能過活而生怖畏。此即登地菩薩。因深果勝。於所受用。不假營為。自然周足。但為利益眾生而行布施。故無不活畏。

△二惡名畏。初學菩薩。雖欲與諸眾生同事。而攝化之。然入諸酒肆等。恒懼譏謗。不能安行自如。而生怖畏。登地菩薩。為度有

情。以大悲心。隨類受生。饒益一切。處天宮不為樂。入地獄不為苦。婬房酒肆。去住無礙。故無惡名畏。

△三怖死畏。初學菩薩。雖欲用廣大心。內外俱施。然有時以財施。而於身命顧惜。不能自捨。而生怖畏。登地菩薩。成就法身慧命。了無生死壽夭。延萬劫不為長。促一念不為短。但為度脫有情。隨機示現長短壽命之相。心無罣礙。故無怖死畏。

△四惡道畏。初學菩薩。懼生惡道。於不善法。分別對治。令其不生。常生怖畏。登地菩薩。或修禪觀之行。或起利生之心。雖有思惟。離諸散亂。隨願度生。平等無礙。故無惡道畏。

△五大眾威德畏。初學菩薩。或於王庭執理之處。或於善解法義人前。申宗敵論。唯恐有失。而生怖畏。登地菩薩。具足一切。悲智雙運。或現神通。或說妙法。或入禪定。或行苦行。所作業行。一切真實。百萬人天。縱任無礙。故無大眾威德畏。

四明五明論

四明五明論者。一聲明。聲。即聲教。明。即明了。謂世間文章算數建立之法。皆悉明了通達故。二因明。因。即萬法生起之因。謂世間種種言論。及圖書印璽。地水火風。萬法之因。皆悉明了通達故。三醫方明。即醫治之方法也。謂世間種種病患。或癲癇蠱毒。四大不調。鬼神呪咀。寒熱諸病。皆悉曉了其因。通達對治故。四工巧明工。即工業。巧。即巧妙。謂世間文詞讚咏。乃至營造成邑。農田商賈。種種音樂。卜。算。天文。地理。一切工業巧妙。皆悉明了通達故。五內明。內即佛法內教也。謂以持戒。治破戒。禪定。治散亂。智慧。治愚痴。乃至種種染淨。邪正。生死。涅槃。對治之法。皆悉明了通達故。言四明者。除內明也。

二十五有

二十五有者。四部洲為四有。及修羅。地獄。餓鬼。畜生。為八有。並欲界四王。忉利。夜魔。兜率。化樂。他化六天。為十四。加色界四禪。為十八。及摩醯首羅大梵王天。與無想天。並五那含天。為二十一。合無色界四空天。共成二十五有。

見惑

見惑者。分別曰見。謂意識對法塵。非理籌度起諸邪見。如外道計斷計常。乃至有無等見。名見惑。惑者。迷惑也。謂諸眾生。於一切法。不了自性本空。妄生執著。惑於正道。流轉生死也。此見惑。開為八十八使。以五利五鈍十惑。於三界中。以三四諦攝。三苦下具有十惑。成三十。三集。三滅下。除身見。邊見。戒取。各具餘七惑。成四十二。合前有七十二。三道諦下。除身見。邊見。各具餘八惑。成二十四。合前有九十六。又於上二界四諦下。各除瞋惑。去此八瞋。止有八十八也。

思惑

思惑者。俱生日思。為眼耳鼻舌身意六根。對於色聲香味觸法六塵。貪愛染著。迷而不覺。是名思惑。依法數中。唯取五鈍使中貪瞋痴慢四惑。於三界九地中。欲界一地。四惑全有。上二界八地除瞋。唯貪痴慢。於此九地。地地分為九品。九九成八十一品思惑也。

塵沙惑

塵沙惑者。即界外四十二品無明分劑頭數。又以理事論。理惑。即見思。能障真諦之理故。事惑。即塵沙。能障化導覆俗諦之法故。轉善作惡

轉善作惡者。華嚴經。無厭足王。隱菩薩相。現王者身。居多羅幢城。示惡持威。嚴刑酷法。折伏剛強暴惡眾生。可治者治。可攝者攝。罰其罪惡。決其諍訟。撫其孤弱。皆令永斷殺盜邪淫。此則名為轉善作惡也。

轉惡作善

轉惡作善者。涅槃經波羅柰國有屠兒。名曰廣額。日以殺羊為事。舍利弗往化之。即回心受戒。放下屠刀。自言我是千佛中一數也。以男為女

以男為女者。維摩居士示疾。佛敕文殊往問。舍利弗隨之。彼有天女。妙入不思議境界。舍利弗謂言。汝何不轉女身。天女曰。我從十二年來。求女人相。了不可得。當何所轉。即時天女以神通力。變舍利弗令如天女。天自化身如舍利弗。而問言。何不轉女身。舍利弗以天女相而答言。我今不知何轉而變為女身也。

以女為男

以女為男者。法華經。龍女獻寶珠。世尊納受。即往南方無垢世界。成等正覺也。

願生樂土

願生樂土者。佛世有王。名頻婆娑羅。其王夫人。名韋提希。其子阿闍世。逆父禁母。母在禁中。一心遙想如來。以求救拔。果感如來為說十六觀經。令彼發願往生樂土。

誓願度生

誓願度生者。彌陀因中為法藏比丘。廣發四十八願願我來世。我國中無有地獄。餓鬼。禽畜。以至蜎飛蠕動之類。不得是願。終不作佛。如是願願度生。同歸安養也。

願為閻羅天子

願為閻羅天子者。梁皇懺云。昔毗沙門國王。與韋陀始王共戰。兵力不如。因發誓願。願我後生為地獄主。治此罪人。十八大臣亦如

是願。後果如之。闍羅天子。即毗沙國王是。十八大臣。即十八獄王是也。

八十種好

八十種隨形好者一無見頂相。二鼻高孔不現。三眉如初月。四耳輪幅相墮成。五身堅實如那羅延。六骨際如鈎鎖。七身一時回如象王。八行時足去地四寸印文現。九爪如赤銅色。十膝骨堅著圓好。十一身清潔。十二身柔軟。十三身不曲。十四指長纖圓。十五指文覆藏。十六脈深不現。十七踝不現。十八身潤澤。十九身自持不逶迤。二十身滿足。二十一容儀備足。二十二容儀滿足。二十三住處安。無能動者。二十四威振一切。二十五一切樂觀。二十六面不長大。二十七正容白不撓色。二十八面具滿足。二十九脣如頻婆果色。三十舌深音遠。三十一臍深圓好。三十二毛右旋。三十三手足滿。三十四手足如意。三十五手文明直。三十六手文長。三十七手文不斷。三十八一切惡心眾生。見者和悅。三十九面廣姝好。四十隨眾生意。和悅與語。四十一毛孔出香氣。四十二口出無上香。四十三威儀如師子。四十四進止如象王。四十五行法如鵝王。四十六頭如摩陀那果。四十七一切聲分具足。四十八四牙白利。四十九舌色赤。五十舌薄廣。五十一毛紅色。五十二毛軟淨。五十三廣長眼。五十四孔門相具。五十五手足赤白如蓮花色。五十六臍不出。五十七腹不現。五十八細腹。五十九身不傾動。六十身持重。六十一其身大。六十二身長。六十三手足軟滑。六十四四邊光各一丈。六十五光炤身而行。六十六等視眾生。六十七不輕眾生。六十八隨眾生音聲。不增不減。六十九說法不著。七十隨眾生語言說法。七十一發音報眾聲。七十二次第有因緣說法。七十三一切眾生不能盡觀相。七十四觀無厭足。七十五髮長好。七十六髮不亂。七十七髮旋好。七十八髮色青珠。七十九面淨如滿月。八十手足有德相。

三十二相

三十二相者。所謂足下平滿。因持戒故。

△千輻輪相。因修施故。

△足跟傭相。不欺眾生故。

△指纖長相。護正法故。

△指網縵相。不壞他眾故。

△手足軟相。施妙好服故。

△七處滿相。施淨飲食故。

△鹿王腨相。喜聞佛法故。

△馬陰藏相。覆載他過故。

△身如師王相。廣修善法故。

△缺骨平滿相。善化眾生故。

△臂肘傭相。救護怖畏故。
△手摩膝相。見善樂助故。
△清淨身相。常修十善故。
△食至喉現相。常施病藥故。
△師子頰相莊嚴善法故。
△四十齒相。心語平等故。
△齒密相。和合諍訟故。
△齒齊相。施珍寶故。
△四牙白相。三業清淨故。
△廣長舌相。護口過故。
△味中上味相。成就功德故。
△梵音相。常軟語故。
△紺色目相。修慈心故。
△牛王睫相。至心求道故。
△白毫光相。讚他功德故。
△頂肉髻相。敬父母師故。
△身軟柔相。樂說法故。
△身金光相。施敷具故。
△孔毛生相。離說世事故。
△身毛上靡相。受師友教故。
△髮色金精相。不惡加生故。
△得身如尼拘陀相。常修三昧故。
△得那羅身相。喜作佛像故。

下卷之一

十種大數

十種大數者。一者阿僧祇。梵語阿僧祇。華言無數。謂從百洛叉。為一俱胝。乃至千千萬萬俱胝等。為一阿僧祇。
△二者無量。謂從阿僧祇阿僧祇。為一阿僧祇轉。阿僧祇轉阿僧祇轉。為一無量。
△三者無邊。謂從無量無量。為一無量轉。無量轉無量轉。為一無邊。
△四者無等。謂從無邊無邊。為一無邊轉。無邊轉無邊轉。為一無等。
△五者不可數。謂從無等無等。為一無等轉。無等轉無等轉。為一不可數。

△六者不可稱。謂從不可數不可數。為一不可數轉。不可數轉不可數轉。為一不可稱。

△七者不可思。謂從不可稱不可稱為一不可稱轉。不可稱轉不可稱轉。為一不可思。

△八者不可量。謂從不可思不可思。為一不可思轉。不可思轉不可思轉。為一不可量。

△九者不可說。謂從不可量不可量。為一不可量轉。不可量轉不可量轉。為一不可說。

△十者不可說不可說。謂從不可說不可說。為一不可說轉。不可說轉不可說轉。為一不可說不可說也。此是不可言說法門。

一行三昧

一行三昧者。出文殊所說摩訶般若經。梵語三昧。華言調直定。又云正定一行三昧者。惟專一行修習正定也。謂修行之人。應處空間。捨諸亂意繫心實理。想念一佛。專稱名字。隨佛方所。端身正向。能於一佛念念相續而不懈怠。於一念中。即能得見十方諸佛獲大辯才也。

十禪定

十禪定者。一普光明三昧。謂身土重重。相入周徧。廣無限故。

△二妙光明三昧。謂自他身心境界無礙故。

△三次第佛國土三昧。謂以如幻智。應物動寂。依根本智。恒無往來。現延促故。

△四清淨身心。行三昧。謂過阿僧祇世界。於諸佛所散花供養。勤求法故。

△五知過去莊嚴藏三昧。謂知過去諸佛。出現劫剎。度生壽命之次第故。

△六智光明藏。三昧。謂未來劫中。說佛已說法。及未說法。皆悉知故。

△七了知一切世界佛莊嚴三昧。謂能徧入十方世界。見一切佛化莊嚴故。

△八一切眾生差別身三昧。謂人身入。夜叉身出。乃至剎那入。三世起故。

△九法界自在三昧。謂自身毛孔。入三昧而作諸佛事。得法界自在故。

△十無礙輪三昧。謂住無礙三業。徧入佛土。成眾生智。轉淨法輪。紹佛種故。

十金剛

十金剛者。華嚴經云。

△一者。覺了諸法金剛心。謂菩薩大願。誓欲了知無量無邊。不可窮盡一切法故。

△二者。化度眾生金剛心。謂菩薩以無上涅槃。度脫無量無邊眾生出諸趣故。

△三者。莊嚴世界菩薩金剛心。謂十方世界無量無邊。當以諸佛國土最上莊嚴之具。而莊嚴故。

△四者。善根迴向金剛心。謂菩薩以種種善根。皆悉迴向無上佛果菩提。普及法界眾生故。

△五者。奉事大師金剛心。謂菩薩以善根功德。供養無量無邊諸佛。悉周徧故。

△六者。實證諸佛金剛心。謂菩薩於諸法實相之理。非實。非虛。非有。非無。悉皆真實而證知故。

△七者。廣行忍辱金剛心。謂菩薩或被眾生訶罵楚撻。或截手足。或割耳鼻。或挑其目。或級其頭。如是一切皆能忍受。無瞋恨故。

△八者。長時修行金剛心。謂未來世劫。無量無邊不可窮劫。我當盡彼劫中行菩薩道。教化眾生。永無疲倦故。

△九者自行滿足金剛心。謂菩薩建立妙行。以清淨心為本。能滿一切功德善根。具足無上菩提道故。

△十者。令他願滿金剛心。謂菩薩自行既滿。慈悲之心。轉更增上。為求解脫者。說於涅槃。為求佛法者。說於大乘之法。悉皆令其心願滿故。

十忍

十忍者。華嚴經云。

△一音聲忍。謂聞佛深教。即能曉了。忍可忍證。無驚怖故。

△二順忍。謂於理事。悉能隨順。諦審此法。忍可忍證。而無違故。

△三無生忍。謂了達諸法。本來無生。亦無有滅。諦審此法。忍可忍證。而妄念不起故。

△四如幻忍。謂了達諸法。皆從因緣和合而生。如幻如化。性本空寂。諦審此法。忍可忍證。而無著故。

△五如燄忍。謂了知一切境界。悉如陽燄。無有真實。諦審此法。忍可忍證。而無執故。

△六如夢忍。謂了諸妄心。皆如夢境。諦審此法。忍可忍證。而不執故。

△七如響忍。謂了一切世間語言音聲。皆由因緣和合而成。猶如谷響。無有真實。諦審此法。忍可忍證。而不著故。

△八如影忍。謂了達色身。由五蘊積集而成。本無實體。諦審此法。忍可忍證。而無著故。

△九如化忍。謂了達世間諸法。無而忽有。有即還無。體非真實。諦審此法。忍可忍證。而無著故。

△十如空忍謂了達世出世間種種諸法。悉如虛空。無有色相。諦審此法。忍可忍證。而無著故。

十身

十身者。法報化。三合顯是為一身。開法報。為二身。法報化。為三身。兼隨應。為四身。法身如虛空。徧周滿法界。無有障礙。諸佛眾生。平等具足。唯一無二。是為圓身。報身如日光。徧普照法界。不與二乘等共。然報身有二種。一自報身。謂如來因地中。修習無量福慧。所起無邊真實功德。恒自受用廣大法樂故。二他報身。繇如來平等智。示現微妙清淨功德之身。居純淨土。為住十地諸菩薩眾。現神通力。轉正法輪。令彼受用大乘法樂故。應身如日影。徧謂如來身。如日之影。現於水中。各隨人去。如東行者。見日東去。如西行者。見日西去。謂諸如來。不捨眾生。如影隨形。現同事攝故。言五身者。一者小教。丈六金身。謂以如來示現出家。成道。初於鹿野苑中。轉四諦生滅法。專化二乘而二乘人。但見丈六金身故。二者。始教。千百億化身。謂如來次說大乘。廣談實相。而於千百億世界中。示現種種色身。正化菩薩。兼化二乘。以是眾生所見。各各不同故。三者。終教。丈六即是真身。謂如來次說大乘。終極理趣。會一切法。咸歸實相。二乘闡提。悉得成佛。機緣既熟。所見如來丈六金身。即是真常不遷之身故。四者。頓教。大乘。丈六即是法身。謂以如來。不從漸次。唯談圓頓妙理。空有兩忘。色心無礙。大乘菩薩。了一切法。無非法身故。五者。圓教。具足十身。謂如來稱性宣揚。圓融法界。如理如智。法法圓融。塵塵無礙。統諸教差別身。全法界平等體。一切菩提願智等身。無不具足。

酒有三十六失

酒有三十六失者。四分律云。飲酒犯三十六種失。

△不孝父母。

△輕慢師友。

△不敬三寶。

△不信經法。

△誹謗沙門。

△訐露人罪。

△恒悅妄語。

△誣人惡事。

△傳言兩舌。

△惡口傷人。

△生病之根。
△鬪諍之本。
△惡名流布。
△人所憎嫌。
△排斥聖賢。
△怨讐天地。
△廢忘事業。
△破散家財。
△恒無慚愧。
△不知羞恥。
△無故捶打奴僕。
△橫殺眾生。
△姦淫他妻。
△偷人財物。
△疏遠善人。
△狎近惡友。
△常懷恚怒。
△日夜憂愁。
△牽東引西。
△持南著北。
△倒溝臥路。
△墮車墜馬。
△逢河落水。
△持燈失火。
△暑月熱亡。
△寒天凍死。

又智論云三十五失
三十五失者。現世財物虛竭。
△眾病之門。
△鬪諍之本。
△裸露無恥。
△醜名惡露。人所不敬。
△無復智慧。
△所應得不得。已得物散失。
△伏匿之事。盡向人說。
△種種事業。廢不成辦。
△醉為愁本。以多失故。醒乃慚愧。
△身力轉少。

△色身敗壞。
△不知敬父。
△不知敬母。
△不敬師長。
△不敬婆羅門。
△不敬伯叔一切尊長。
△不尊敬佛。
△不敬法。
△不敬僧。
△結黨惡人。
△疏遠賢人。
△作破戒人。
△恒無慚愧。
△不守六情。
△縱色放逸。
△人所憎惡。不喜見之。
△貴重親識。共所擯棄。
△行不善法。
△棄捨善法。
△明人智者所不用信。
△遠離涅槃。
△狂癡因果。
△身壞命終。墮三惡道。
△若得為人。所生之處。常愚癡暗鈍。

諸戒俱喪

諸戒俱喪者。昔有優婆塞治田。因渴誤飲於酒。不覺酣醉。忍鄰家有雞來其舍。即殺而食之。鄰女往索。又強與姪。後理官。復妄言不取。只此一飲。五戒俱喪。

為半偈捨全身

為半偈捨全身者。昔菩薩於雪山修道。天帝釋往試之。化為夜叉。口說半偈云。諸行無常。是生滅法。菩薩求說後之半偈。夜叉曰。我腹饑虛。何暇為說。菩薩曰。願為說。我則捨身供養。即敷座請說。夜叉曰。生滅滅已。寂滅為樂。菩薩聞已。即以此偈徧書於山石樹木之間。登樹捨身。夜叉以手接之。復其本形。作禮而去。

身然千燈

身然千燈者。報恩經云。如來往昔為轉輪王。好行惠施。時世饑荒。王乃設大施會。以五百象載上好飲食。衣服。七寶之具。溥施一切眾生。內使誤取毒井之水作食。饑民食者。毒發皆死。王乃除

毒填井。念財施無益。法施無窮。繇是擊鼓宣令。四方求法。時有婆羅門。知解佛法而謂曰。不違供養。當為汝說。王曰。希何供耶。答曰。大王若能身割千瘡。灌以膏油。然燈供養應爾。王遂捨諸國土。城邑妻子。臣妾。命旃陀羅剜肉然燈。婆羅門為說半偈云。夫生輒死。此滅為樂。王大歡喜。時天帝釋現身謂曰。汝身然燈。為求生天耶。魔王耶。梵王耶。王曰。我求無上阿耨菩提。我願不虛身瘡平復發是願已。身即如故。五百太子。合國臣民。見已歡喜。皆發阿耨多羅三藐三菩提心。

身為牀座

身為牀座者。法華經。提婆達多品。佛於多劫。嘗作國王。委政太子。宣令求法。時有阿私仙。來白王言。我有大乘。名妙法蓮華。若不違我當為宣說。王聞仙言歡喜踊躍。即隨仙人供給所須。采果汲水。捨薪設食。乃至以身而為牀座。於時奉事經於千歲。為於法故。精勤給侍。令無所乏也。

布髮掩泥

布髮掩泥者。昔如來因中。行菩薩行。值燈光佛於泥塗。布髮掩泥以乘佛足。次即記曰。汝於來世。當得作佛。號釋迦牟尼。

嘗啼賣心肝而學般若

常啼賣心肝者。常啼。即薩陀波崙菩薩。為求般若深法。賣心肝以興供養。入城聲價。諸魔隱蔽。令眾不聞。有長者女。獨聞其聲。召曰。願隨所須。以助供養。繇是菩薩得近善知識。開解妙法。得證甚深般若波羅蜜門。

鷗去海翁機

鷗去海翁機者。列子云。海上之人好鷗者。每旦之海上。從鷗鳥遊。鷗之至者。百數不止。其父曰。吾聞鷗鳥皆從汝遊。可取來與吾玩之。明日之海上。鷗鳥舞而不下。

鵠搖羅漢影

鵠搖羅漢影者。昔有鵠為鷹所逐。趨避於舍利弗之影。猶戰慄不已。遷於佛影。方乃釋然。繇羅漢尚有殺之習氣。未能如佛之大慈悲也。

旃陀羅

旃陀羅者。梵語旃陀羅。此云屠者。四姓之中。唯此為惡。行則搖鈴為號。人聞聲者。即遠避之。

譚婆

譚婆者。梵語譚婆。此云食狗肉人。每於路行。狗見而瞋吠之。

童子南詢

童子南者詢。華嚴經。善財童子。展轉南行。經歷一百一十城。參五十三善知識。各獲三昧解脫門。

衲僧徧歷千山

衲僧徧歷千山者。唐大隨法真禪師。有僧問。劫火洞然。這個壞與不壞。答云壞。僧云恁麼則隨他去也。答云隨他去。其僧疑之。尋師參叩。徧歷千山。至於萬里。古所謂。一句隨他語。千山走衲僧是也。

投子三登洞山九上

投子三登洞山九上者。雪峰存禪師為大事不明。三登投子。九上洞山。

巖老躬處癟房而吮洗無忌

巖老者。唐智巖。於石頭城。置癟人坊。為其說法。吮膿洗穢。無不曲盡。永徽中。終於癟所。顏色不變。異香經旬。

寬公輿歸病者僧俗不分

寬公者。唐智寬。性慈好惠。瞻病人。不計道俗。及路遠近。無人治者。即輿來房中。躬自經理。有患癰膿不能出。口為吮之。遂獲痊可。

飛錫止鬪

飛錫止鬪者。鄧隱峯禪師詣五臺。路淮西。屬吳元濟。阻兵拒命。官軍與賊交鋒。未決勝負。師乃擲錫空中。飛身而過。兩軍將士。仰視空中。鬪心頓息。

擲鞋解圍

擲鞋解圍者。睦州陳尊宿。時遇賊兵圍城。人民荒亂。師作大草鞋一隻。命懸城上。賊兵見之。共相告曰。此有至人居焉。乃抽兵而去。

下卷之二

十四種大願

十四種大願者。一者。常能念佛親近善知識。二者。常能捨離諸惡知識。三者。乃至失命因緣不犯佛戒。四者。常能讀誦大乘經律。問甚深義。如法修學。五者。常能於無上菩提而生信心。六者。若見眾生有苦惱時常能救護。七者。常能隨力供養三寶。八者。常能孝順父母。敬事師長。不敢違忤。九者。常能捨諸懈怠。勤求佛道。十者。於五塵上諸煩惱生時。能制伏其心。十一者。眾生無邊誓願度。十二者。煩惱無盡誓願斷。十三者。法門無量誓願學。十四者。佛道無上誓願成。

在家菩薩六重二十八輕戒

六重戒者。一不殺生。二不偷盜。三不虛說。四不邪淫。五不宣說四眾過罪。六不酷酒。

二十八輕者。一不能供養父母師長。二耽樂飲酒。三惡心不能瞻視痛苦。四有乞者不能多少分與遣空還。五見四眾不能承迎禮拜問訊。六見四眾毀所受戒。心生憍慢。七月六齋日。不受八戒供三寶。八四十里中有講法處。不能往聽。九受招提僧臥具床坐。十疑水有蟲。故便飲之。十一險難之處。無伴獨行。十二獨宿尼寺。十三為於財命。打罵奴婢僮僕。外人。十四以殮食施四眾。十五畜貓狸。十六畜養象馬牛羊駝驢。一切禽獸。十七不儲畜僧伽黎衣鉢。錫杖。十八若須田作。不求淨水。及陸種處。十九物說價已。捨賤趨貴。斗秤量物。不令平用。二十於非處非時行欲。二十一隱瞞官稅。二十二犯國制。二十三得新穀。菓。蓏。菜茹。不先供奉三寶先自受。二十四僧若不聽說法讚歎輒自作。二十五道路若在比丘。沙彌前行。二十六僧中付食。若偏為師選擇美好過分與。二十七養蠶。二十八路遇病者不能瞻視。為作方便。付囑所在。

圓覺五性差別

五性者。一凡夫性。謂於事理二障。未得斷滅。名未成佛。二小乘性。謂諸眾生。永捨貪欲。先除事障。未斷理障。但能悟入聲聞緣覺。未能顯住菩薩境界。三菩薩性。謂諸末世一切眾生。欲泛如來大圓覺海。先當發願。勤斷二障。二障已伏。即能悟入菩薩境界。若事理障。已永斷滅。即入如來微妙圓覺。滿足菩提。及大涅槃。四不定性。謂諸眾生。皆證圓覺。逢善知識。依彼所作因地法行。爾時修習。便有頓漸。若遇如來無上菩提正修行路。根無大小。皆成佛果。五外道性。謂諸眾生。雖求善友。遇邪見者。未得正悟。是則名為外道種性。邪師過謬。非眾生咎。是名圓覺互性差別。

五濁

五濁者。一劫濁。約四濁立此假名。四濁增劇。聚在此時。二煩惱濁。五鈍使為體。三災為相故。三眾生濁。謂見慢果報。立此假名。惡名穢稱為相故。四見濁。五利使為體。諸見轉增為相故。命五濁。連持色心為體。摧年減壽為相故。

臨濟發悟於首座

臨濟發悟者。臨濟義玄禪師。初在黃檗會中。時睦州為首座。乃問臨濟。上座在此多少時。曰。三年。州曰。曾參問否。曰。不曾問。不知問箇甚麼。州曰。何不問如何是佛法的大意。明日檗上堂。師依教而問。三度被打。後辭去參大愚。於言下大悟。愚令嗣黃檗焉。

昌黎發悟於三平

昌黎發悟者。韓文公問大顛曰。某甲軍州事繁。佛法有要處。乞師一語。師。良久。公。罔措。時三平為侍者。乃敲禪床三下。師

曰。作麼。平曰。先以定動。後以智拔。公乃曰。和尚門風高峻。某甲於侍者邊得箇入處。

十無盡句

十無盡句者。所謂眾生不可盡。我願不可盡。世界不可盡。我願不可盡。虛空不可盡。我願不可盡。法性不可盡。我願不可盡。涅槃不可盡。我願不可盡。佛出世不何盡。我願不可盡。諸佛智慧不可盡。我願不可盡。心緣不可盡。我願不可盡。起智不可盡。我願不可盡。世間道種。法道種。智慧道種不可盡。我願不可盡。若十種可盡。我願乃可盡。是則又為十無盡願也。

附直解事義(終)

No. 698-A 梵網經直解跋並頌

潤。自戊辰歲求戒楚河廣長社。得讀和尚所註。梵網經略疏。遂歷寒暑。日夜繼之。僅於菩薩心地品分。知上卷所詮。智理觀行。修證階級。下卷所詮。輕重開遮。止持作犯之名言而已。嗣後自臺山侍巾鉢之神京。每伺揮塵之暇。跪陣柬筆。請發略疏之覆。既旋維揚石塔。一日緝編告成。焚香展讀不數紙。即了舍那光。釋迦光。玄主光。光無二致。報佛說。化佛說。和尚說。說本同源。開圓頓之門於現前。徹名言之岐於當下。允矣和尚天性。江漢灌來。粉飾文章。不添隻字。直就本文掀翻佛意。因以直解名焉。然而楚河刻略疏。維揚刻直解。精神何所致耶。今年庚辰閏正月來。復加覃思。研覈精微。壽棗華山。遠流佛化。此其四無量心。再三為人故若是矣。吁。攝受一切眾生。但解法師語。盡受得戒。即入諸佛位者。其為梵網圓頓歟。直令上中下機。一值此經。即奠佛位於自心者。其為直解詳明歟。而今後讀之者。不必言和尚報身之今說。即舍那報身之重說。但惟信現前仁者之今學。即過去菩薩之再學。則與千百億釋迦。同一鼻孔出氣矣。夫其摩醯首羅天王宮。是誰指之而入哉。潤。不能效藥王神光之為。而不禁篤信。申吐數語。不稱跋。不稱頌。聊誌廣長法乳。源遠而流長云爾。頌曰。

如來心藏及戒藏。因果佛性常住藏。我今字字從師授。慈悲喜捨四無量。流通天上與人間。觀察諸法真實相。百億諸佛一毛端。時時常把光明放。善哉直解絕支離。入梵網門為最上。普願人人如我心。二利福德盡迴向。四恩三有證菩提。蓮華端坐無虛誑。

時崇禎庚辰歲二月十九日

楚峽州律弟子戒潤和南拜題

梵網經戒光(一卷)

清 淨挺 著

弘云。收于閱經十二種之第七。故省于此。

CBETA 賽助資訊

(<https://www.cbeta.org/donation/index.php>).

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」— CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 19538811

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the users to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

線上信用卡 / PayPal 贊助

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
